



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 10

Nov 2022 matongdang Hollongi nung Greenfield airport renemtsü

Nagaland nung yakta saisapong infrastructure tajungba akümtsü

VOL. XIX NO. 78 (ADOK 78) DIMAPUR

RASEMNÜ (WEDNESDAY)

LUCHII (DECEMBER) 29, 2021

₹ 5.00

COVID-19 Nagaland: 1 dak putet & 8 taneptsü angu

Kohima, December 28, 2021 (TYO): Nagaland nung Mongulbarnü nisung ka dak COVID-19 putet aser nisung 8 taneptsü angu.

Tanü Dimapur nung nisung ka dak COVID-19 putet aser külen nisung tenet taneptsü angu. Maneni, Kohima nunga nisung ka taneptsü angu.

Tang tashi nung nisung 32,185 nungi 30,339 taneptsü nguogo aser ibaji taneptsü angur 94.26% lir.

Tang nisung 75 anepaludar saka parnok 60 dakbo shirangba yimya kecha mali ta Dr. Nyan Kikon-i ashi. "December 22, 2021 tashi nung nisung 759,123

nem COVID-19 vaccine indang dose 13,32,991 agütsüogo" ta State Immunization Officer Dr Ritu Thurr-ia metetdaksü.

Vaccine agirtemji frontline workers 60,985, healthcare workers 16,005, arishi küm 45 ser tempur 213,972 aser arishi küm 18 nungi 44 tsünga alir 468,161 lir, ta pai ashi.

"Vaccine agirtem rongnungi nisung 574,868-i dose anaprong agiogo. Parnokji frontline workers 48,609, healthcare workers 13,540, arishi küm 45 ser tempur 178,694 aser arishi küm 18 nungi 44 tsünga alir 334,025 lir" ta Dr Thurr-isa metetdaksü.

Nagaland nungi dang masü NE ajunga nungi AFSPA agientsüla: Conrad Sangma

Dimapur, December 28, 2021 (TYO): Nagaland nungi Armed Forces Special Power Act (AFSPA) agientsü atema shimtetba ludeni North East ajunga nungi agientsü atema meyipa reprangshimtsüla ta Meghalaya chief minister Conrad Sangma-i ashi.

Mongulbarnü Dimapur nung Nationalist People's Party (NPP) Nagaland unit president Andrew Ahoto'er kidang osangbener den jembidang Conrad Sangma-i iba ya nenshia metetdaksü.

"Centre-i shimtetba luden ajanga Nagaland dang masü saka Northeast ajunga atema asadangtsüla. Nagaland nungi iba Act agientsü atema state aser Centre sorkartemi külemi inyaksüla" ta pai ashi.

"India sorkari Northeast nung temolung kanga agütsür aser rongsenketzung renlokba tsütsü tejakleni aoer. Ajisüaka, AFSPA ajanga Northeast renlokba nung tetsükdaksü agütsür anungji Nagaland nungi dang masü saka Northeast ajunga nungi iba Act agientsüla" ta Conrad-i

metetdaksü. Mon district kübok Oting nung sepaitemi nisung 14 tepsetba ajanga AFSPA ajanga tajung madokba jungkai adoka sayuogo. Iba tashiyim Act ya loktiliba aser democracy nung benoktsü nungdak madoker ta paisa ashi.

"NPP-i political party ka ama iba Act Nagaland nungi dang masü saka Northeast ajunga nungi agientsü takhangba agütsür. Iba Act agienba ajanga nübortem ajungmesotsü aser sorkar dak tamang akatsü" ta Conrad-isa ashi.

Meghalaya CM Conrad-i December 30, 2021 nü Union Home minister Amit Shah den ajuruteptsü sentong lir aser iba mapang pai Nagaland indang tensa osang lemsateptsü nangzük. Conrad Sangma ya Manipur kübok Senapati district nungi meyipa arudang Dimapur nung anenzük.

Senapati district kübok Makhel yim nung Mao Students Union küm 88 abensaba sentong nung pa aden.

COVID-19: Delhi nung 'Yellow Alert' sangoktsür

New Delhi, December 28, 2021 (Agencies): Delhi Chief Minister Arvind Kejriwal-i Graded Response Action Plan (GRAP) kübok Delhi nung 'yellow alert' agütsüba osang metetdaksü.

Tesüiba anogo ishika Delhi nung COVID-19 positivity rate ji 0.5% liasü aser iba nung ajemdaker 'yellow alert' agütsür ta pai ashi. Iba tetuyuba kübok school, college, cinema hall, gym aser spa tem shibangtsü. Ajisüaka, metro train aser bus nung nisung 50% amentsü melar.

"Tawa Covid putetertem kangabo meshiranger aser nisung aika dak putetaka oxygen

mesüra ventilator balaka mamshir. Taoba mapang dang nungi onok 10 ben agi tajungba renema lir" ta Chief minister Arvind Kejriwal-i ashi.

Delhi nung 'yellow alert' aliba mapang tetuyubatem:

Aonung 10:00 ako nungi anepdang 5:00 ako tashi night curfew alitsü.

Nija office tem nung 50% staff dang aotsü. Ajisüaka iba nung essential services (includes hospitals, media, banks, insurance companies & telecom services) maden.

Kiyimba sentong agitsü melar saka nisung 20 tashi dang

India nung anti-Covid pill aser vaccine tasen 2 amshitsü melar



INDIA APPROVES TWO MORE COVID-19 VACCINES

ANTI-VIRAL PILL MOLNUPIRAVIR

New Delhi, December 28, 2021 (Agencies): Ministry of Health and Family Welfare-i India nung Corbevax aser Covovax Covid vaccine tem den anti-viral drug Molnupiravir amshitsü temelaba agütsüogo.

"Central Drug Authority CDSO-i Serum Institute of India indang Covid-19 vaccine Covovax, Biological E indang Corbevax aser anti-Covid pill Molnupiravir emergency mapang amshitsü temelaba agütsüogo" ta Mongulbarnü

Union Health Minister Mansukh Mandaviya-i metetdaksü.

Central Drugs Control Organisation (CDSCO) indang Subject Expert Committee (SEC) on COVID-19 ajanga telatetba kar lia COVID-19 vaccine tem-Covovax aser Corbevax amshitsü junger ta emergency use authorisation (EUA) agütsüba sülen tanü iba osang metetdaksüogo.

Iba temelaba ajanga India nung 'emergency use

authorisation' anguba Covid vaccine ajak agi 8 kümogo.

Taoba mapang Serum Institute indang Covishield, Bharat Biotech indang Covaxin, Zydus Cadila indang ZyCoV-D, Russia indang Sputnik V aser US nung yangluba Moderna and Johnson and Johnson Covid-19 vaccine tem ajanga EUA nguogo.

"Nanoparticle Vaccine, Covovax ya Pune nung amenoka aliba Serum Institute of India ajanga yanglutsü" ta Mansukh Mandaviya-i ashi.

CORBEVAX vaccine ya India nung mezüng yangluba RBD protein sub-unit vaccine lir. Iba ya Hyderabad nung amenoka aliba Biological-E ajanga yanglur.

Molnupiravir ta ajaba antiviral drug ya India nung company 13-i yanglutsü. Ajisüaka iba mozü ya COVID-19 agi shiranger taintem dak 'emergency situation' nung dang amshitsü.

Army-i uniform mesemi aser prangpong mebeni arutsü melar: Konyak CSOs

Dimapur, December 28, 2021 (Agencies): Indian army-i uniform mesemi aser prangpong mebeni Oting nung bushisügang asütsü melar ta Konyak civil society organisations (CSOs)-i metetdaksüogo.

"Indian Army-i bushisügang asütsü melar saka parnokki uniform masemtsüla aser prangpong mabentsüla. Army inquiry committee-i tiptema mapa inyaksü atema state sorkar nungdakba mapa inyaksü mepishir" ta Konyak Union (KU), Konyak Nyupuh Sheko Khung (KNSK) aser Konyak Students' Union (KSU) teloktemi metetdaksü.

"Union Home Ministry-i Oting nung takoksa angur nem temeten agütsütsü bilemba atema tenüngsang agütsür. Maneni, Nagaland Chief Minister Neiphiu Rio, Deputy CM Y Patton aser NPF legislature party leader TR Zeliang nungeri December 23, 2021 nü New Delhi nung mapa inyakba atema tenüngsang agütsür" ta parnokki ashi.

"Ajisüaka, Union Home Minister Amit Shah den ajurutepdang Oting nung atalokba osang shitak ashitsü atema teshimtet nübo ka danga maliasü. Maneni, AFSPA agientsü atema Inquiry Committee tentetba nunga 'ground zero' züngsem ka danga maliba atema tebilemstü abener, kechiyong küm aika AFSPA kübok civilian temi timtema aruba indang osangji 'ground zero' nung alirtemi tajungba shitettsü" ta Konyak CSOs-isa metetdaksüogo.

Inquiry Committee nung züngsentemi osang yangludang meimchir indang jenjang angatettsüla. Küm aika meimchir temeten mali liyonga arur aser iba ama tia ka nung ozüng alema tashiyim mapa aika inyakogo, ta parnokisa ashi.

Iba luden ajanga agütsüba osang nung ajemdaker tensa majungtsüsa langka danga atalokra Konyak CSOs-i

tebilemstü khuret kecha mabentsü ta parnokisa metetdaksü.

"Indian Army-i ajak nem temeten agütsütsü ta ashiba ya külen tsütsü shir nangzükba ama bilemer aser teratatsü ka lir. Konyak nunger tai maketba lanur 14 tepsetba Indian Army sepaitem merenshitsü atema Konyak nungeri akhanger" ta telok asemisa metetdaksü.

Mon district nung Indian armed forces melenba ajanga temelenshi kecha bentsür marutsü. Pei sensotem kümzüka meyetetba security nungdak mali, ta Konyak CSOs-isa ashi.

Parnokisa state sorkar dang Tiru Police Outpost Station nung police mapa melemezüksüba atema asügangdango.

"India Tir dangi memorandum züluba nung anogo 30 atakzükja lir aser ibaji January 10 nü tembanger. Tai maketba nisung tepsetertem civil court ka kübok maitsür aser iba mapang tsünga yimjak nung parnok merenshiba osang memetetdaksüra onoki January 18, 2022 nü Konyak Summit ayonga tarutsü nung inyaka aotsü telemtetba agitsü" ta Konyak CSOs-isa metetdaksü.

Maneni, Centre sorkari Konyak nunger ya India senso asü masü'ar kuli agütsütsüla ta parnokisa ashi.

CKT küm 75 ajungba jubilee mung sentong tenzükogo



Chuchuyimpang Kaketshir Telongjem platinum jubilee sentong December 28 nü lapokja Nagaland University nung tesayur Prof. Lanusashi Lkr-i jembiba mapang tangokba noksa nung angur.

Chuchuyimpang, Luchii/Dec 28 (TYO): Chuchuyimpang Kaketshir Telongjem kümsük 75 ajungba platinum jubilee sentong "Mangdangsen" omen dak rangloker December 28, 2021 nü Chuchuyimpang yimdak Nagaland University

FNR-i Desmond Tutu bilemteter

Dimapur, Luchii/Dec. 28 (TYO): Ajaki meima aliba Archbishop Desmond Tutu, December 26, 2021 nü asüba ajanga Naga nung molungjang nung nendaka bilemba ka aiter. Alima ajunga den külemi asenok dak nungi kotaka bener ao, aji aseni meteter. Archbishop Tutu ya balaka liasü, shiba indang otsü Tsüngremi zülutsü, ta Forum for Naga Reconciliation ajanga December 28, 2021 nü sangdong ka nung ashi. Teimla makar nem teimla agütsütsü aser azüdokshi agi sünger aliba mapang yimjung agütsütsü atema pa aso, aser tesenpatep aser ochimashi agi sünga aliba alima matsüngdang apudaktsü pai memolung. Tutu ya nübur aser kin ajunga den sako ama jaja. Alima asoshi aser Naga nung asoshi pa ya kulisür ka liasü, ta FNR sangdong ajanga ashi. Forum for Naga Reconciliation (FNR) dangi

ayongzüka liasü. Iba sentong nung Ongpangkong Kaketshir Mungdang (OKM) tir Limatongzük Jamir aser Longmisa Kaketshir Senden Reju tir, Kilenmeren nati jubilee salem o lemsatepa liasü. Jubilee benjong den külemi tanep par yimdak Chuchuyimpang Educational Trust-i achayanga shisatokden sentong tajung ka liogo. Iba sentong nung shisalen sayurtemji; Symbiosis Creation (P) Ltd. Managing Director, Mongkum Jamir aser Under Secretary (Urban Development & Municipal Affairs) Rongsenmenla na liasü. December 29 nü sentep asem tashi lir. Item sentep balala nung MLADr. Ngangshi K Ao, Mokochung SP Aotula T Imchen IPS, Dr. N. Moa Imsong, Imoakum Jamir BDO aser Akok Walling nungertemi shilem balala agütsü.

December 2009 nung Tutu-i shidi ka züluba nung tang Naga Reconciliation indang shia liasü. "Putepshitsü lenmang shimtetba ajanga lokti ka tain akumba aser meimchir yimya liru akumtsüpuba sayur. Asenoki dangar meimchir masü ama züngshiba mapang asen sasa asem meimchir masü ama kumdaktsür... Iba yongji nenoki ner lenmang nung ayamesoa jajadang, nenoki taneptsü angutsü aser mapang talangka nungi nür nüburtem sülen anishia aruba tanüla ajurutsü tasü tait molungsentsü agütsütsü, ta kü nem teimla agütsür... Nenok inyaksangshi nung takok angutsü imlar aser Tsüngremi nenok nem shisatsü agütsütsü aser nenok timtemba nung tongtipang mapang nenok kumzüka ayutsü asoshi sarasademtsür," ta pai shidi nung shia liasü. Anungji asenok Naga nung aser talisa Naga Political

State sorkari telemtetba memelenshitsu: CPO

Dimapur, Luchii/Dec. 28 (TYO): Nagaland nung district tasen kar tentetsü asoshi state sorkari December 18, 2021 nü telemtetba agiba nung ajemdaker nisung kari tai apuba aser ola adokba langzüa Chakhroma Public Organisation (CPO) ajanga sangdong ka December 28, 2021 nü agüja liasü. Deputy Commissioner, Dimapur indang office ya Chümoukedima nung shimteta aliba tesemi belentsü asoshi CPO ajanga state sorkar nem October 30, 2021 nü tezüluba agütsü aser "Official Gazette (2nd December 1997) nung adokba aser metetdaksüba ama Deputy Commissioner indang office belentsü jenjang ka nung state sorkar melira district tasen ka tentetsüla," ta shia liasü, ta sangdong ajanga ashi. Anungji sorkari Dimapur nungi district tasen ana tentetsü asoshi shimtet aser December 20, 2021 nü sangdonga liasü. Chümoukedima district balaka kumtetba ya state sorkari mera shidak agiba ama CPO-ibo bilemer, kechiaser iba ya ajanga arütsüa aliba Seithekema, Dhansiripar aser Medziphema subdivision tem lungjemdaktsür, ta ashi.

Assam Rifles temi sentong balala ayongzük

Dimapur, Luchii/Dec. 28 (TYO): HQ IGAR (North) kübok Assam Rifles, Ghaspani Battalion ajanga December 28, 2021 nü "Today's Youth Tomorrow's Future" omen nung ajemdaker shisaliok kota tongtipang aser loktiliba nung lanur shilem indang lecture cum seminar ka Model Village, Kohima nung ayongzüka liasü. Iba sentong nung lanurtem dang loktiliba tali tajungba kumdaktsütsü asoshi shisaliok temaba jenjang bushitsü ajungmesoa liasü. Iba sentong nung kaketshir 120 arua shilem agia liasü aser parnok dang jenjang tajungba atema sempet dak apet lenmang tem bushitsü ajungshia liasü. Assam Rifles temi kaketshir tem ajungmesoa iba ama sentong agiba atema school

IT&C Department-i 7 buba e-Naga Summit ayongzüka agiogo



Kohima nung December 28, 2021 nü 7 buba e-Naga Summit akaba mapang tangokba noksa ka nung shisalen sayur, IT&C ketdangsur aser dangartem angur.

Kohima, Luchii/Dec. 28 (TYO): Information Technology & Communication Department, Nagaland ajanga December 28, 2021 nü "Towards promotion of International trade through Information Technology" omen nung ajemdaker 7 buba e-Naga Summit sentong IT&C Conference Hall, Kohima nung ayongzüka liasü. International trade ya asenoki koma inyaker ta asüba

mapa temelaba kumdaktsür ka lir aser ICIB ya state den küm ter dak tema lungjemer yangi adokba oset balala aser sobaliba oset tem temaba jenjangi ajungkettsür, ta pai ashi. Tashidak wara agi tesem ajunga sünga aliba tensa maneni lir, anungji alima nung shishilempaba tsütsü aintsü asoshi IT ya tongtipang ka lir. Nagaland nung ninang mojitzü tajung angur aser ano king chilly, chiro aser ano mozü mamshi adokdaksüba chiyongtsü asoshi state nung nükla tulu lir, ta pai ashi. Pai state nung producer tem dang pei kishizung nung aliba technology amshitsü ajungshia liasü. Information technology ajanga online facility balala adokdaksüba ajanga producer temi aliba tesem ajunga nung aliba market tongdaksütsü

temelaba akumer, ta pai ashi. Nagaland nunga item maongka lir, koba mamshidang, anungji entrepreneurs temi tila nungi tenzükä tulu kumdaktsütsü ajungshia liasü. Wadang mashi nung akokba agi yaritsü aser alima nung linük 200 nung Naga nung lanur asoshi maongka peria lir, ta Singh-i ashi. Naga nungeri dangar dang tajemzükba ama bilemer, anungji pei sasa adokdaksüba temaba jenjangi ajungkettsü memolunger, ta Delhi Public School indang Pro Vice Chairman aser Chairman, Echahaba Tea Growers Cooperation Society Ltd., Dr Ao Toshi-i ashi. IT revolution ajanga kechiserna ajak melenshiogo aser osettsüset aginüba tali kumogo, ta pai ashi. Pai lanurtem dang dangar

Nov 2022 matongdang Hollongi nung Greenfield airport renemtsü: Arunachal CM



Itanagar, December 28, 2021 (Agencies): Arunachal Pradesh kübok Hollongi nung Greenfield airport November 2022 matongdang renemtsü, ta Arunachal Pradesh chief minister Pema Khandu-i metetdaksü.

Mongulbarnü Arunachal Pradesh CM Khandu-i Greenfield airport yangludak

semdanga liasü. Centre aser Arunachal Pradesh sorkartemi August 2022 matongdang airport lapoktsü meranger.

"Hollongi airport mapa kanga junga inyakdar. Airport nung 2300 metres runway nungi 1500 metres yangluzükogo" ta Arunachal CM-i ashi.

"Iba ya Arunachal Pradesh

nunger atema pungmang ka lir" ta Pema Khandu-i metetdaksü.

Iba mapang BJP Lok Sabha MP Tapir Gao-i CM Khandu meina senzü.

Greenfield Airport ya hectares 320 nung yanglur aser iba airport yangluzükba sülen Airbus A321 amala narrow-body jets anenzüksü akok.

Piles Anepaluba - H.Umar Chesam dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajisüaka, tang H. Umar Chesam contact no. 9863758600 / 6909717178 State & National awardee H. Umar Chesam Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali.

Time: 9 AM - 5 PM Yours sincerely - Alemba, Kumlong Mkg.

Central Covid-19 team-i Mizoram semdang

Aizawl, December 28, 2021 (Agencies): Mizoram nung Covid-19 kanga prokshiba atema Centre sorkari teshimtet telok ka yokogo.

Mizoram nung Covid positivity ji 10.27% lir ta Mizoram Health & Family Welfare Department ktdangsurtemi ashi.

Mongulbarnü Union Health Ministry data ajanga Mizoram nung Covid active case ratio ji 1.02% lir aser ibaji linük nung teimtiba lir.

"Multi-disciplinary Central team-i anogo pungunü state semdangdang Kolasib aser tanga district tem, Covid Care Centres aser Zoram Medical College & Hospital semdangtsü aser state sorkar

ktdangsurtem den sendentem amentsü" ta Mizoram integrated disease control and surveillance programme atema state nodal officer Pachuau Lalmalsawma-i ashi.

"Hokolbarnü parnoki Mizoram nungi maodang central team-i Covid-19 azüoktsü atema lenmangtem ashitsü" ta Lalmalsawma-isa metetdaksü.

India nung nisung asüba national average ji 1.38% lir saka Mizoram nungbo 0.38% dang lir aser ibaji state tem rongnung tajemtiba lir, ta Union Health Ministry data ajanga ashi.

Tang tashi nung Mizoram nung nisung 1,40,748 dak COVID-19 putet saka nisung 541 dang taküm sama.

Tripura anasa Bangladesh nung prangpong-injang aika angu

Agartala, December 28, 2021 (Agencies): Tripura anasa Bangladesh lushu nung prangpong-injang aika ngutetogo.

India security ktdangsurtemi Bangladesh ktdangsurtem den iba osang metetpeladar ta osang angazüker.

Hombarnü Bangladesh Counter-Terrorism and Transnational Crime (CTTC)

unit ajanga Satchhari National Park nung prangpong-injangtem ngutet. Iba tesem ya Tripura nung India-Bangladesh border nungi kilometer 4 shi dang pilar lir. Iba tesem nung rocket-propelled grenades (RPG) 15, machine gun ammunition 510 rounds aser boosters 25 angu.

Jamaat-ul-Mujahideen Bangladesh (JMB) amala kiralongraba teloktemi Bangladesh nung dang masü

saka India nunga kiralongraba mapa inyaksü tasa atonga lir ta tawa tu Indian intelligence agencies-i sorkar nem osang agütsüogo.

Pakistan indang ISI tetuyuba kübok JMB-i Sheikh Hasina'er sorkar raksatsütsü atema tasa atonga lir ta parnokisa ashi.

ISI-i Bangladesh nung aliba kiralongraba teloktem nem prangpong-injangtem agüja yarir, ta parnokisa shisem.



Assam kübok Cachar district nung napong kati nisung mesükba techanu ka tasü mopu. Iba 'humanoid' kid tenütsü, tenük, tebang aser temang nung tanga shilemtemi nisung mesüka liasü. Iba techanu dak tetsung ana keta liasü saka tepen maliasü. Napong techanu mopuba osang angashia Nandubasti yimdakilrtemi reprangdangtsü atema Shankar Das'er kidang adenshia liasü. (Cachar, December 28)

Assamese tsür rongnung IPS ktdangsur Violet Baruah-i IGP kümogo

Guwahati, December 28, 2021 (Agencies): IPS ktdangsur Violet Baruah-i Assamese tsür rongnung mezüngbuba IGP kümogo.

"Ni Inspector General of Police (IGP) indang jenjang nung ajungketogo" ta Hombarnü Baruah-i Twitter nung iba osang lemsatet.

"Assam State nung tetsür rongnung mezüng IGP menden tongtetba ya temoatsü ama agizüker" ta lai ashi.

Baruah ya Assam-

Meghalaya cadre (2005 batch) indang IPS ktdangsur ka lir aser tesem balala nung lai Assam Police department tenüng nung inyakogo.

2019 küm February ita IPS officer Violet Baruah-i Assam Police indang mezüng tetsür DIG aküm.

Taküm küm tetenzüklen January ita Republic Day 2021 anogomung nungtem nung Violet Baruah nem President's Police Medal agüja liasü. State aser linük

tenzükba wadang nung alakteta shilem tajung agiba ajiteta la nem iba naroküm agütsü.

Violet Baruah ya tekolok techira kaketshir tajung ka liasü aser la Cotton College (tang University) nung azüng. Baruah-i 9th APBn, Barhampur indang Commandant ama inyakogo.

2020 küm Violet Baruah-i BTAD nung Deputy Inspector General of Police (DIG) ama inyaka liasü.

Dibrugarh University kaketshir ka dak COVID putet

Dibrugarh, December 28, 2021 (Agencies): Assam Dibrugarh University kübok Dibrugarh University nung kaketshir ka dak COVID-19 putetogo.

Iba kaketshir ya tawa tu South Africa nungi aruba liasü.

India kübok state aser union territory ajak nung COVID-19 indang Omicron variant azüoktsü atema temolung agütsüba mapang ka nung iba kaketshir indang sample ji genome sequencing atema yokogo.

Jorhat, Assam nung aliba North East Institute of Science and Technology (NEIST) nung genome sequencing asütsü.

Tang kaketshirji Jokai Covid care centre nung isolation nung

yua lir.

Dibrugarh University kaketshir ya Pharmaceutical Sciences department azünger.

Northeast nung nisung ka dak COVID-19 indang Omicron variant putetogo.

Iba nisung ya Manipur nung lir aser pa dak Northeast nung mezüngbuba Omicron variant putet.

Arishi küm 48 tain nisung ya tawa tu Tanzania nungi Manipur-i aru aser Hombarnü pa dak Omicron aliba putet.

Pa ya tang Imphal nung aliba JNIMS Hospital nung anepaludar.

Külen iba nisung'er kibong nungi züngsem asem dak COVID-19 putetogo.



Arunachal Pradesh Congress Committee (APCC)-i 137 buba Congress Foundation Day aser Bangladesh Liberation War 1971 sülen küm 50 abensaba Vijay Diwas among. Iba sentong ya Rajiv Gandhi Bhawan, Itanagar nung ayongzük among aser APCC President Nabam Tuki-i ashiba agi Indian National Congress-i teti nisungtem taginüba atema inyaktsür. (Itanagar, December 28)



TIR YIMYIM

YIMOBILEM (EDITORIAL)

DIMAPUR

RASEMNÜ

LUCIII 29, 2021

Yimya tasentem

Alima nung nisunger yimya agi lendong, tashidak aser aya tzüra timtem agi pei dak matalok aser mekongshi tashibo kecha süoki ia mebilemer. Ajisüaka, pei dak atalokerbo aika atema peisasa kümzüksü menuadoker asür. Taoba küm nungi tang tashi Covid-19 tashidak wara agi asenok taküm aser kibong aika dak kongshiogo, anungji iba takoksa aser timtemji parnoki meteta lir, saka ano, asenok tia ajung, nisung aika dak mekongshi, anungji tashidak wara agi mekongshirtem rongnung nisung aikati, tang tashi, Covid-19 tashidak wara ya tiyazü olulu tashidak ka ama dang bilemer. Aji oda, tashidak mesenji tenük agi mangur asünungji, ashiko, tangari ashiba nung mamangtetter asütsü, ajisüaka pei dak atalok dangang "ya asangsanga" ta metettsüabajibo kanga lendong aser tesasatsü mapa asütsü. Tanü putu yimya asünungji, nübortem asoshi tajunga aika ngutettsü aser yanglutettsü, saka ano külen Covid-19 tashidak amai ano tashidak tasena aika poktettsü. Aji oda, metsütsüi ano Covid-19 nungi jakzüka aoba Omicron tashidak wara tasen agi, joko, Manipur state tashi atongba osang angashibaji asenok asoshi tekümdangshitsü osang ka sangdonger amai asütsü. Aji oda, Delhi nungi tenzüka Assam tashi nung aonung nisung mashimashi mesenzüdaktsütsü asoshi 'curfew' agüja lir aser Delhi ama nungbo nisung 20 dak tali adentsüsa lokti sentong meyangludaktsür. Iba amai tashidak ka anema raraya alidang, ano tashidak tasen ka poktetba ya ajanga asenok libaliru yimyatem ya aika memelenshinüyonga melenshitsuasa akümer. Asenok akhidangbo metsümeshii aodang tzü mamshi, kaket mesüra süngtang agidang merüktet. Ibai asen tsüraburtem yimya liasü, saka kodang shisa tenük tera lapoka temang merükmejutsü angazük, joko metsümeshidanga tzü amshi, anogo shia tzü chigu, tepu meyu aser teka jungjunga metsüker chiyong. Itemji tsüraburtem asoshi libaliruba nung yimya tasen, new normal, liasü. Iba amaji, tanüa Covid-19 tashidak poktetba ajanga asenok libaliru nung temelenshi tasen aika adokogo. Joko, teka o teka na amtepa salemteptsüabaj awashi memetet yimya amai kümogo aser tangar alidak teni tebang nembanger mesenzüra, mashimalu nisung ka ama tangartem jagi repranger. Aji oda, lokti kuma menungteptsü aser teti sapon amshia pei teka metsütsüba mapatem ya asenok loktiliba nung yimya tasen, new Normal, kümogo. Joko, alima ya yamai dang aotsü, anungji tashidak tasen ka poktetli, iba atemaji mozü tasen ka yangluli aser asenok libalirua melenshili ta asütsü. Item nungji asenoki anidaktettsüla. Alima nung nübortem temang anema lidaktsütsü atema shisatsü, nübo aser rongsen agi nungdakba purtem tonga oagi yaritsü United Nations-i tentetba, World Health Organization (WHO) lenirtemi alima nung tashidak wara mepoktet ser nung pokteter ama alima nung alirtem memesüshitsü. Aji oda, tashidak wara mali ser mozü kidang doctor aser nurse-temi süoshi temang ajak longpanga agir anogo piyong chia mechiyong nisungtem yaria mamongtsü. Joko, Omicron tashidak agi asen lima tonga arutsü ana nung likaji, asenoki akok tashi Whatsapp nung tapu tapu osang prokshibatem nung ya mamangi, WHO aser asenok den alir medical doctor-temi kechi ashir ta asüba nung tashi angaa anidaktsü tim. Yimya tasentem rongnung teni tebang nembangba aser teti teka metsüka aliba yimyatem yabo Covid wara maliyonga joko asenok sobaliba kümer benshiyonga aotsüabaji tajung asütsü. Teni tebang nembangba aser teka metsükba ya tangar dang nungi asen tashidak memenatsüabaj masü saka asen dak nungi tangar tashidak memenadaktsütsü asoshi, timtem liaka, inyaker ta asenoki angatetdi. Item ajakji tanü putu tasenba nung asen temang anema alitsü atema inyaker tenzüka yimya tasentem asütsü. Joko, küm 18 teküpbok purtema taruba küm tasen tenzükli nungibo Covid jem agitsü aser tashidak aketer tantsür tamburtema temang nung tashi itta alitsü atema mozü agütsütsü. Item ajak ya tashidak tongpang nung nokdaktsü renemba yimya tasentem lir, anungji pei lima aser pei nübortem meima ajaki yimya tasentemji benshitsuasa.

OLEMSABANG

Lalushipong

Talimoa Longkümer

(Maneni yashi adok nungi...)

Christmas, New Year aser Satiba (Wedding) Sentong nung Lalushibongba

Materialism nem asenok meyokdaktsüogo. Arogo nung kechi sentong südir ajakji outward show aser competition dang kuma aoba angur. Christmas ya Santa Claus nem meyokdaktsüogo aser New Year celebration ya Hindu nung benjung ka ama kuma odaki - Menjiwapong Jamir

Tanü asen lima Christmas, New Year aser sati benjong amala sentong ya kanga dang mera keta decoration nung rongsen aika enoka pelatepa amonger. Joko professional decoration yanglur hire süa rongsen, nübu jenti lalushipongba ajangshia arudagi. Kar nungbo decoration agi toktepba angur. Talisa Christmas benjong mapang Santa Claus lemjem, yimdong aser tenlaki kima sen jenti lalua toktepa yanglutepba angur. Santa Claus ya market symbol ka kümogo. Marketization of Christmas mesüdaktsütsü merangtsüla. Yamaji küm nung khen dang Christmas/New Year amongtsü ta sür rongsen jenti decoration nung lalur. Christmas, New Year benjong nung akok tashi tongmelang agi tubor junga enoktsü ajungshitsuasa. Akok nungbo Christmas decoration amala ya asen sobaliba maparen nung angatettsüsa amshi nung tajungba asütsü, saka kechi atema südir süaka pulpit aser sentep ki nung naro tali amshia decoration nung senotsü tali entokba ya melenshitsuasa. Pulpit akhümket ya mesamadaktsütsüla.

Ano sati benjong decoration toktepa yanglutepba ya tebilemtsü tulu ka lir. Sati mapang Arogoi kibur dang decoration simple süa dang enokang ta shitettsüla. Mapang balala, sentong balala nung amshitsu Arogoi decoration naro amala alia ayu nung kanga dang ajungtsü. Ibai ajanga rongsen jenti kümzüksü.

'Lalushipongba' Laishiba nungi kar

Lalushipongba ya Tsüngremi sempaba mapa ka ta Laishiba nungi kuli aika angutsü. Luk 15 nungji tamadokba chiri tebu dang pa shilem rongsen meshizüka bener alima talang kati oa pei rongsen lalushiponga senzü. Kodang pai pa rongsen entokma aser aya-wara tulu ka adok pa kanga sensak atenba shia angur. Ozü rongsen, kü mulung, ni benden anungji ni sünütsü asütsü, shingai ni nokdangtsü makok ta bilema amajok nung rongsen laluba ajanga tatem nung khuret tulu bener arutsür ta angatetdi. Lalushipong masübaji teka kodanga mesalaba ta asübaji masü, saka amajok nung meindokba, iba indang Laishibai jangjatsür. Tajung Samaria nungbai pa rongsen entok mesasai leman nung timtemer yariba angur. Pa yangku nungi medical expenses, transportation, fooding, lodging & care taker fees, item ajak asoshi rongsen mapayui taküm ka kümzüksü agütsü. Taküm ka kümzükba nung aser lokti yanglushiba nung rongsen tenlatsüla. Tanü arogotemi kechi nungsa rongsen entoker aser kechi nungsa mulungsoa peroker? Pelatepa benjong bentsü amongdang entokba rongsen jagi timtema ya-a tzüra alirtem noktadaktsü nung Tsüngrem mepelali ma?

Yisu alima nung alidang sayatenya mapa aika inyaker. Koda masüba mapang tzü agi yi (wine) kümdaktsü (Yohan 2:1-11). Telokti yaa tzüraba mapang amtsük pongu aser ango ana agi telok meyi pongu tema peridaktsü. Saka kodanga lalushiponga amajok nung meindok. Pa nütsüngtem dang "kecha mesamatsüsa tanungba tanük-tarigi bendenang" ta ozüng agütsü (Yohan 6:12). Sayatenya agi chiyungtsü molamoshia poktetdaktsüba Yisui süaka Pai amajok nung lalushipongtsü memela. Tanü benjungbentsü nung rongsen talang agi alia renemba chiyungtsütem asenoki junga ketdang südar ma? Takarsangi kenüamati benjung yanglua liasü saka par kishi anasa ontaka aliba Lazar mangu. Alima nung alidang pai tia tajung ajangzük saka sensaker tenük agi mongui rongsen lalushipong. Alima nung alidang tenük agi sensaker mongui lalushipongba tajangzük takarsangi asü yim nung angu (Luk 16:19-31). Joko alima aika nung lalushipongba ya temenen dang masü saka crime against humanity ta ozüng yanglua aibelenertem asoshi temerenshi lir. Süra, arogo nung amangbapurtemi item ya meshisadangi lalushipongra tasüngdangtsü tulu ama bilemer.

Otembang

Kodang tongtibang onük ka nung lokti kati atsüshitepa, shisa lemsatepa jembidir idangji tajangzük aser tangazükba aika angur, inyakyim tajungtem jangjashitsür aser melenshitsuasa. Item ajak ya kija asoshi masü saka asen lima arogo tajungba melenshia yanglushitsu nükjidong nung ajaki jembir. Süra kodang, shibai, koma melenshitsu? Asenoki aiben ajak angateta aser meteta dang lir ama saka temelenshi bener arutsü mapa agi sayua metenzüker. Takar tular tashi temetetertemi anir onok rongsen aika liaka amajok nung lalushiponga meindoker ta libaliru (practical) ajanga sayua sensaker den lemsatepa alibaji koda jangratemtsü aser tatishitsu tajung? Amangba purtemi kecha tarendak makai tongmelang agi benjongbentsü sentongtem nung rongsen kanga lalushipong mesüi amongtsü tenzükd. Amanger, rongsen aika entoka yangluba decoration ajanga agütsüba tepela dang nungi telemsatep, teyaritepa ajanga agütsüba tepelaji tuluba asütsü. Talisa, Tsüngrem dangi meyipa temoatsü tepelaji tematiba tepala asütsü. Joko tangar jilo ajizükba yimya ya entoker Tsüngremi koma aginer yamaji inyaka alitsü merangdi ta ayongzük. Tamadokba chir-i lalushiponga rongsen entokmar tebu ki koma menungra temulung raksa-a meyipa ao yamaji Tsüngrem dang tatok meshia asenoki lalushipongba temenen nangzüka Tsüngrem dangi odi ta ayongzük.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Kolkata nung Saint Teresa-i tentetba Missionaries of Charity nungi nun temi makamaiter aser teyari nungdaka alirtem nem chiyongsü lema agütsüba noksa nung angur.

Küm noklang aika sülen Bethlehem tenlaki yanglushitsü

Bethlehem, Luchii/Dec. 28 (Agencies): Bethlehem nung aliba Church of the Nativity ya küm noklang aika lir tang mezüngbuba yanglushitsü lir.

CBN News ajanga ashiba agi, akhi mapang yanglua aliba tekülem ki ya Roman Emperor Constantine-i tetsüi mepishiba ama mela liasü. Iba Church of the Nativity ya Khristanpur asoshi rali-walir tem atsür arutsü tesem tongtipang ka lir, kechiaser Yisu Khrista asoba tesem nung iba tekülem ki ya yanglu ta aikati amanger.

"Alima tesem balala nungi nisungtem aru shia nüburttem nem yimjung aser temeim agütsütsü asoshi yangi Yisu aso ta angateter," ta Church of the Nativity Greek Orthodox Parish Priest Father Issa Thaljih-i ashi.

Iba tekülem ki ya aiben raksatsür aser yanglushia liasü, aser tesüsa iba tekülem ki ya 2013 nung yanglushi. Bethlehem Development Foundation's (BDF) ajanga Bethlehem tasen kuma yanglushitsü nükjidong nung shilem ka ama parnoki Church of the Nativity ya tanaben yanglushi tenzüksü atema sen peria bendenteta liasü. Tang Manager Square yanglushir lir.

Iba sülen Church of the Nativity ya yanglushitsü.

Teyanglushirtemi iba tekülem ki undang kilem aser kijiba tem yanglushi tenzükogo. "Iba tekülem ki yangludang inokba kijiba chichiba bo mali. Parnoki kijiba tasen agi melen," ta BDF indang CEO Mazen Karam-i ashi.

Tekülem ki jara ya inoker küm 850 dak tama süyioigo aser chichiba atem kanga junga yanglushitsü nungdaker.

"Long, tile aser aina sentsü balala (mosaic) inokba shilem 11 dang anünga lir. Tanünga ajunga samaogo. Anungji parnoki itemji ajak mürektet. Itemji menener liasü," ta Karam-i ashi.

Item oset mürekba mapang parnoki noksa nung kotak tenyar tasembuba ngutet, ta CBN News ajanga ashi.

"Kotak tenyar tasembuba ya plaster agi nepbanger liasü, aser kotak tenyar ajunga yagi longpok len tuyur lir, kong Yisu aso," ta Karam-i ashi.

Iba tekülem ki yanglushitsü asoshi senotsü bendentsü atema BDK ajanga "adopt-a-column" sentong ka tenzük. Tetenlar temi sen agütsüba ajanga tekülem ki indang column 50 ya

yanglushitsü, koba Byzantine Empire Justinian I ajanga century trok buba nung mesoa liasü. Yanglushitsü atema column shia sen \$50,000 aotsü.

Putir kisüng aotsü melaba langpang nunga talila yanglushia liasü.

"Mapang süyia aodang meraksa tsüngta onoki ajak tetenzük dang aliba ama yanglutsü meranger," ta Greek restoration company Artis nungi art conservator Andreas Miaoulis-i CBN News dang ashi.

Tekülem ki tejaklen küm 250 tain hon agi meyibanga jiteta aliba tema yanglushiogo.

"Tekülem ki nung tanak aliba ya temo milen nungi mokozi adokba aser nisung dak nungi temo aluba alitsü, kechiaser nisung timbai ajak nung kongshir aser idangji parnok teka nungi temu terara nüloka yutsür," ta Miaoulis-i ashi.

"Onoki itemji mürek. Onoki itemji yanglushi. Aser hon agi yangluba süngo tu samar aliba onoki tanaben inoka akhi ama yutsütsü meranger," ta pai ashi.

Bethlehem region atema sen million \$30 bendena aliba nungi Church of the Nativity yanglutsü atema sen million \$15 amshioigo.

Karnataka state nung anti-conversion ozüng agizükogo

December 28, 2021: Karnataka Legislative Assembly nung anti-conversion bill agizükogo, aser iba ozüng ya India nung anti-conversion ozüngtem rongnung tesashiba asütsü, ta International Christian Concern (ICC)-i metetdaksü.

Brihostibarnü (December 23) Karnataka Legislative Assembly nung Karnataka Right to Freedom of Religion Bill, 2021 agizüka liasü. Iba bill kübok state sorkari tamangba yimsü meyipba dak sendakba temzüng ajak yanglushitsü.

Tan hopta ICC nungi

osangbenertem den jembidang India nung Khristan activist, Dr. John Dayal-i, "Tanü Karnataka nung benokba bill ya anti-conversion ozüngtem tesashiba rongnung ka asütsü," ta metetdaksü.

"Iba bill nung tebilemsü tulu kaji- yimsü meyipdaksürtem küm 3 nungi küm 10 tashi tepuokdak ayutsü," ta paisa metetdaksü.

Karnataka nung pastor kati, "Iba ozüng ya kecha masü saka tesempartem ket nung hadir ka agütsüba dang lir. Iba ozüng ya Khristantem amokmerenertem

kümzüksü atema lir," ta ashi. Karnataka Legislative Assembly nung anti-conversion bill benoka o lemtepa mapang nunga state kübok Chikkaballapur district nung Tenla ki ka raksaja liasü.

India nung Odisha, Madhya Pradesh, Uttar Pradesh, Arunachal Pradesh, Chhattisgarh, Gujarat, Jharkhand, Himachal Pradesh aser Uttarakhand state tem nunga anti-conversion ozüng benoka lir, aser item ozüng nung ajemdaker Khristantem anema inyaker.

ANOGO ABEN TSÜNGREM DEN

Atetta atsüngba O

Kechiaser Tsüngrem O taküm, aser teinyak aser anatsü nok ajak dang nungi techiraba; aser taküm o tanela tatentep aser tenüngla ya ajak ateta tsünga bendangtetba aser temulung tebilemba aser tasa asaba yakta metetba. Ibri 4:12

Oset ana teti tatem makai alitsü: Tsüngrem O aser nüburtanela. Teyangluba nüburtanela shia tesem ka nung tatem maka mapang intoktsü, kotak nung teti tatem maka Tsüngrem den, mesüra Tsüngrem den pilar teti tatem maka molumi nung. Yamaji Tsüngrem O teti tatem makai alitsü, "Ayi akongtsü, naro azülatsü, saka Tsüngrem O teti alitsü" (Isaia 40:8). Yisu Khrista (Tsüngrem Chir) Oji lir (Yn: 1:1, 14), aser Pa yashi, tanü aser teti kasa dang lir (Ibri 13:8).

Asenoki taküm Tsüngrem O bushidang iba yagi asenoki tai inyakba putetdaksür aser asenoki tia ajak ajangtettsüsa renemtsür. Tsüngrem Oi asenok taküm nung taroktiba tashi aitsü akoker. Kechi agi asen taküm aser tanela mesüra teloktep shia aser tenüngla tashi ateta atsüngtsü akok? Tsüngremer Oi atsüngtsü akok. Saka Tsüngremer Oi tarokba aitsü akok. Iba kakat yagi tebilemba aser temulung shisatetba ajak bendangtsü akok. Kodang asenoki tangari au ta asütsüsa langka tajung inyakdir, aser shingai asen tebilemba memetet ta asenoki bilemer, Tsüngremi metet. Kodang asenoki Khrista nükjitong sayua langka tajung inyakdir, Tsüngrem Oi ibaji jungkai adoktsür. Khrista asoshi nai ne taküm lenir asü? Ibaji inyaktsü asoshi tajungtiba lemanji Tsüngremer O ne taküm nung taküm O ama lidakja aser mapa inyakdaksübaji tajungtiba lemanjir. Ibai zügang! Bushiang! Ibai tashi angang! Iba nung shisadangang! Idangji na azükarutsü aser takok angutsü (Yohan 1:8).

Kibuba, tanü ni Ne O kümdanga kü mulung nung rizüngjang. Amen.

Christmas mapang Texas nung tekülem ki ka window ajunga raksatsü

Austin, Luchii/Dec. 28 (Agencies): Nisung kati Christmas atongtsü anogo ka lia Austin, Texas nung aliba Our Savior Lutheran Church tekülem ki indang kijiba aina ajunga amai jaksatsü, saka arogopuri senteper müreka mapa tajung inyaka liasü.

"Christmas pela mungang, kechiaser iba yagi onok manendaktsütsü," ta Pastor Eric Borchers-i iba tatalokba anguba sülen Facebook video ka nung ashi.

Pastor Eric-i ki raksatsür nem tatok agütsü aser küm 20 arogo otsü nung yamai matalokdang, ta ashi.

Iba tekülem ki raksatsür südi ta temolung melemi bilema aliba nisungba ya anepdang 6:00 ako (par mapang) meta yintong ka amer arua kijiba aina jaksatsüba security camera nung angu.

Iba nisungba ya tekolok meshidak bo masü amai bilemer, ta Borchers-i ashi. Iba nisungba yagi tekülem ki yutsür aoba mapang peo (whistle) apua liasü.

Mezüngbo item teraksa ngur tezü atang, saka arogopur kanga kera adenshia tekülem sentong

metitemi agitsüsa maparen balala inyak, ta pastor-i ashi.

Borchers-i social media nung arogopur aser ano temolunger tem dang arua yaritsü ayongzüka liasü.

"Tekülem ki ya Christmas atongtsü anogo k alia raksatsü. Ibai kangasa majung lir," ta pai Facebook video nung ashi aser ano Christmas benjong sentong agitsü sentong yanglu, ta ashi.

"Tsüngrem taochi agi iba ya ajanga tanü alima nung makmak-shimak agi sünga aliba sayur."

Nüburttem idangjisa renemer arua aina jaksa mürek aser tapok atang.

Parnoki mapang shidak nung iba mapa tembanga Christmas sentong agiteta liasü. Ano Honibar anepdang iba tekülem kidang Christmas sentong agia liasü.

Borchers-i iba nisung nem tatok agütsü aser pa asoshi aria bilemba lemsatetep.

"Kechi atalokogo aji ojang aser pa junga alitsü ta amanger. Pa kumzüka alitsü ta ni amanger," ta pai ashi.

Iba tekülem ki raksatsüba ya sen \$100,000 aser \$300,000 tsüngta asütsü, ta ashir.

OLONG PAITEP # 6037

1		2		3		4				
								5	6	
7					8			9		
				10						
11	12	13						14		15
	16					17				
18					19			20		
				21						
22										
				23						

- | | | | |
|--------------------------------------|--|--|--|
| TIPILEN | | LANGTSÜNGLEN | |
| 1. Temenen mali - (7) | | 1. Timba kümdaktsü - (6) | |
| 5. Nünü-er jala - (3) | | 2. Temang nung timtem chiyungtsü - (4) | |
| 7. Obang medema latet - (6) | | 3. Teka amtep - (5) | |
| 9. Nübo teyi - (3) | | 4. Aonung tesangwa - (3) | |
| 10. Yong-i atakba oset - (6) | | 6. Süng temerem ka - (5) | |
| 11. Meimchir telemsa - (3) | | 8. Tasü masü - (5) | |
| 14. Tajung tamajung telemzükba - (3) | | 9. A _ _ _ sü - (3) | |
| 16. Talem - (6) | | 12. Aou tasentsü - (5) | |
| 18. Tanur angu - (3) | | 13. Rong tapu ka - (3) | |
| 19. Tsüngrem anemsang - (6) | | 15. Tenarong tenang - (6) | |
| 22. Mapang - (3) | | 17. Temeshipur li - (5) | |
| 23. Tepok telong - (7) | | 20. Y _ _ _ - (4) | |
| | | 21. Tasü mang - (3) | |

OLONG PAITEP # 6036 TELANGZÜBA

- | | | |
|---------------------------------------|--|--|
| TIPILEN : | | LANGTSÜNGLEN : |
| 1. Aben, 4. Artsü, 7. Lisem, 8. Liwa, | | 1. Aruli, 3. Balala, 5. Suwar, 6. Belem, |
| 9. Sarasadem, 12. Aket, 14. Mangu, | | 9. Süjak, 10. Aonung, 11. Dokan, |
| 15. Anünü, 16. Ango. | | 13. Tinu. |



Yimdak takarsang-i Alokba o melangzükttet

Alokba : Ohooii... Oko " Na-a kecha maka aser ni-a kecha maka"....
 Ana prongla kecha maka.... Anungji kangabo ulua tebilem...
 Ana jenjang kasa danga.

Takar-ba : Ayaaa...!!! Alokba ajibo odangbo ayutsüla o masüa... Yim
 salang nung jateper jembu nung dang shitak asüja.... Na aji
 langzüksüba renema liang nooo.

(Iba ken o-ji ashishiteptsü takar-sangi yimten dangi ken o aben).

Chairman : Ohooiii... Takar-sang Alokba nena kechi mangatettep'ar rasa-
 a shiangjong....???

Takar-ba : Ena... Ni yimdak Kika-Suchir-Yimboksur nisung ka...Saka
 Alokba kechi komala nisung'ar nenoki meteta lir... Saka pai
 kuna kasa danga ta shiogo... Ni aji hau masür... Anungji kuna
 tsüngda iba ken o-ji nenoki bendangjang...???

Gaon Bura : Adjjjaaaa...!!! Sürabang Alokba kodaser takar-sang nena
 kasa danga ta ashi'ar...
 Iba o-ji yimsurtem dang angateta/rateta shiangjong...???

Alokba : Waaaaa...!!! Ni ashibaji shitak ato... Ni ama sensaker akatsü
 kecha maka.... Saka pa ama takar makatsü kecha maka....
 Kuna prongla kasa langka-bosa maka...Ni aji dang ashi
 ato...!!!

Yimsüsür : Ooooooaaaaaaa...!!!!!! Alokba ne dang kechi
 ashitsü...!!!!!!

~ L.Kika Pongener.

TANÜBO NAI LANGZÜANG

Q. Shibai 'Global Entrepreneur of the Year Award' takok angu?
 [A] Ratan Tata [B] Kumar Mangalam Birla
 [C] Uday Kotak [D] Adi Godrej

(Taruba adok nung onoki langzüksü)

YASHI ADOK TELANGZÜBA : COVID-19

AO OSHI ANGAZÜKDAK:

TANÜ ANGAZÜKTSÜBA OJANG

Longbang
 (v) mekütbang (besiege, surrounded)
 * Yihusua aser par nübortemi Yeriko yimti longbang.

Longküm
 tawa atalokba (recently)
 * Longküm tashibo asen lima süngjema liasü.



Tanur asoba anogo nung salem osang den noksa
 angati adokdaksünüra - Tenüng, Küm, School,
 Talidak & salem osang tejangja zülur, noksa
 (photograph - any size) ka den anogo 3 mesüra 4
 jelia e-mail : tiryimyim@gmail.com nung yokang
 mesüra Tir Yimyim bureau tem nung agüjang.

NAI-A YA METETTER MA

- December 29 Nü Asor Tongtibang Nisung Kar:**
- Scottish chemist, Charles Macintosh (1766)
 - Industrialist Charles Goodyear (1800)
 - 17th president of the United States, Andrew Johnson (1808)
 - Football Hall of Fame member Ray Nitschke (1936)
 - Actor Rajesh Khanna (1942)
 - Rock and Roll Hall of Fame member Rick Danko (1943)
 - Singer Marianne Faithfull (1946)
 - Actor Jon Polito (1950)
 - Singer Yvonne Elliman (1951)
 - Comedian Paula Poundstone (1959)
 - Actor Jude Law (1972)
 - Actor Twinkle Khanna (1974)

SUDOKU # 6077 TELANGZÜBA # 6076

		1	2	9			5	3	9	6	8	4	1	7	2
		6	8	5	3		6	7	1	3	9	2	5	8	4
				3		8	8	2	4	5	1	7	6	3	9
			5		3	2	3	8	7	9	4	6	2	1	5
4					5		9	1	6	8	2	5	7	4	3
6		8	4	2			2	4	5	1	7	3	9	6	8
2	3				5	9	4	9	2	7	6	8	3	5	1
					2		7	5	8	2	3	1	4	9	6
			1	4	8		1	6	3	4	5	9	8	2	7

OJANG LUTEP # 5623

BKOA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>			
PMNAAG	:	<input type="checkbox"/>						
UNNG	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>			
IÜDRS	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>			
KÜAAS	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>			
NAJTUG	:	<input type="checkbox"/>						
IASNYKTÜ	:	<input type="checkbox"/>						
OAHSSI	:	<input type="checkbox"/>						
GAMUULN	:	<input type="checkbox"/>						
TSLIÜLAA	:	<input type="checkbox"/>						

OJANG LUTEP TELANGZÜBA # 5622
 TSÜNGREMER TAOCHI NUNG ASENOK KÜMZÜKA ANIR
 ARUBA YONG TENÜNGSANG AGÜTSÜDI



Delhi sorkari Covid-19 wara azüoktsü atema aonung 11 ako nungi anepdang 5 tashi curfew benoker aliba mapang Chandni Chowk nung police temi nüburttem senzusenpong meita ataba noksa nung angur.

Election mapa ata alirtem nem vaccine dose tasembuba agütsütsü

New Delhi, Luchii/ December 28 (Agencies): Union ministry of health and family welfare-i Mongolbarnü ashiba agi, election agitsü aliba state temi aotsü alirtem frontline workers (FLWs) jenjagi yoktsü aser parnok vaccine dose tasembuba agitsü atema temsüa akümtsü.

Election ya Uttar Pradesh, Uttarakhand, Goa, Punjab aser Manipur ta state pongu nung agitsü renema lir.

Ministry-isa, item nisungtem yagi sorkari yakbang nung inyakertem dak alia healthcare workers aser tanga tashidak keta aliba tintet rogotem nem vaccine agütsütsü aliba ya magi tsüingda pei doctor tem nungi vaccine dose talia agitsü atema ken o ashishitsüla. Iba dose ya taruba küm January ita nungi tenzüka agütsütsü.

Ministry-i ashiba agi, tanga tashidak keta aliba arishi küm 60 aser temapurtemi iba dose magi tsüingda pei doctor-i agütsüba certificate benoktsü kecha nüngdak madoktsü.

Taruba küm nungi tenzüka tanur arishi küm 15 aser 18 tsüingda alirtem nem Covid-19 vaccine agütsütsü. Iba osang ya Ato Kilonser Narendra Modi-i taoba hopta sangdonga liasü.

Hombarnü tetuyuba tasen agütsüba nung, sorkari ashiba agi, tanurtem nem vaccine

agütsüba sentong ya January 3 nü tenzüksü aser dose tasembuba ya January 10 nü nungi agütsütsü.

Sorkarisa, lanurtem atema tang tashi nungbo Bharat Biotech-i yangluba "Covaxin" dang agüja atatsü.

Maneni, vaccine dose tasembuba ya vaccine tanabuba dose agiba sülen ita teku mesera hopta 36 tembangba sülenang agütsütsü, ta kasa sangdong ajanga metetdaksü.

Congress-i democracy amokmerenba tashi anema raratsü: Sonia Gandhi

New Delhi, Luchii/ December 28 (Agencies): Congress tir Sonia Gandhi-i Mongolbarnü, lar party-i India nung democracy amokmerenba teraksatsüba tashi anema raratsü, ta ashi.

Party tenteter küm 137 ajungba anogo video ka ajanga Congress züingsemtem nem osang agütsüba mapang lai, tesempatep dak ajemdaker lokti nung telem dang adokdaksütsü tebilemdangba aliba ajanga India nung secular inyakim nung timtem agütsür, koba India nüjiso atema rara nung kecha shilem mali, ta ashi.

"Parnok dak malangba shilem ka angutsü atema puti otsü zülushitsü parnoki meranger. Parnoki tetsüba

aitdaksür aser tesempatep prokshir aser asenok parliamentary democracy asaa raksatsür," ta lai ashi.

Gandhi-i election nung takok aser tamakok ya paitoktsü makoktsü, ta ashiba den linük nung aliba nüburttem atema Congress party bendanga agütsür lir ta nenshia metetdaksü. "Tanü asenok asen loktitentet tamendakdaki meyipa aor koba, aso 20buba nung pei asoshi mebilemi inyakba India nungertemi ajungmesoba den len ania yanglutetba lir," ta lai ashi.

Tanü New Delhi kübok party headquarters nung Gandhi-i Congress wako salatsüba mapang wako tsüka liasü. Gandhi den Congress treasurer Pawan Bansal aser general secretary KC Venugopal nungeri wako ya mapang tatsüka amer sayaa liasü. Iba sülen wako asongdak melen aser wako atsüketa ayu.

Rahul Gandhi, Priyanka Gandhi Vadra, Mallikarjun Kharge nungera party headquarters nung sentong agiba mapang densema liasü.

Foundation day dak sendakba nung Rahul Gandhi-i, "Onok Congress lir- iba party yagi linük democracy tamendakdak yangertsü aser iba atema onok nüma atanger," ta tweet asü.

Delhi nung school, cinema & gym tem shibanger

New Delhi, Luchii/ December 28 (Agencies): Delhi Disaster Management Authority (DDMA)-i Mongolbarnü "yellow alert" nung shilem ka ama guidelines tasen agütsüogo. Linük yimtiba nung Covid-19 agi shiranger timba küma aoba mapang ka nung tang tetuyuba balala agütsüogo. Yimti nung ita trok tsüingda anogo ka nung nisung timba dak tashidak potetba ajangshiogo.

"Yellow alert" ya anogo ana atonga positivity rate 0.5% dak timba kümra, mesera anogo tenet tsüingda nisung 1,500 tema dak tashidak potetra agütsür.

Omicron variant agi alima ajunga amokmerenba mapang linük yimtiba nunga tenokdangba balala agütsüogo. Sorkar tetuyuba ajanga school, college aser tanga educational institution tem ajak shibanga ayutsü tetuyuba agütsüogo. Iba den ano Cinema aser gym tema tetuyuba tasen ka magütsü tashi shibanga atatsü.

Kasa mapang nung

Restaurant aser bar tem ajak aonung 10 ako tashi lapoktsü melatsü aser tesemdanger shilem 50 dang melatsü. Teti ama online food delivery tem maneni inyaksangshitsü.

Delhi nung aonung 10 nungi 5 ako tashi curfew benoker lir. Mall aser dokantem ajak anepdang 10 ako nungi 8 ako tashi odd-even basis nung lapoktsü temelaba agütsüogo.

Maneni tanga dokantema odd-even tetuyuba nung lapoktsü temelaba agütsüogo.

Spa, salon aser ku mejepdak tesemtem ajak tanga mapang ama dang inyaksangshitsü. Delhi Metro, public bus tem ajak nung passenger tesadang dang abentsü melatsü aser passenger tem nokdaker senzütsü memelatsü.

Yimden yimsüsüba, tamangba yimsü aser lokti tentet balala sendentem ayongzüka agitsü memelatsü. Tetuyuba agütsür aliba mapang metembang tashi item tetuyubatem benoka inyaksangshitsü.



Federation of Resident Doctors Association India züingsemtem aser Safdarjung Hospital Doctor temi NEET tatidang menoa magiba atema Mongolbarnü Safdarjung hospital nung longkak aitba noksa nung angur.

Taoba cricket asayar Mongia aser Congress lenir ana BJP nung aden

New Delhi, Luchii/ December 28 (Agencies): Punjab nung election agitsü lia taoba Congress sorkar yimsüsüba mapang MLA; Fatehjung Singh Bajwa, Balwinder Singh Laddi aser taoba mapang cricket asayar Dinesh Mongia nunger Mongolbarnü Bharatiya Janata Party (BJP) nung denogo.

"Punjab nung Congress lenirtem onok den denogo, kechiyong party yongtsü nung mangatettep aliba aser sorkar dak parnoki temulung masür. Parnoki Ato Kilonser Narendra Modi lenisüba dak tamang yuogo," ta BJP indang Punjab election in charge Union minister Gajendra Singh Shekhawat-i ashi. Paisa, Modi-i aluyimba ozüing aginba ajanga pa temulung uluba sayuogo aser aluyimertem mulung nung sorkari parnok ajungkettsü atema bendanga agütsür lir ta temulung lema bilemer, ta ashi.

Kasa mapang nung Mongia-i ashiba agi, pa BJP nung dena

Punjab nung aliba nüburttem tenzükner. Paisa, BJP-i linük terenlok atema inyaker, ta ashi.


Taoba Sangrur Member of Parliament Rajdev Khalsa, United Christian Front Punjab tir Kamal Bakshi nata BJP nung denogo.

Taoba hopta taoba minister Rana Gurmit Singh Sodhi-i, Congress küm 40 tenzükba sülen BJP nung denogo. Pai ashiba agi, party toktsüba kulitem rongnung party yongtsü nung mangatettep aliba ya ajak dang tongtibangba lir.

Taruba küm Punjab election nung BJP pur taoba chief minister Amarinder Singh-i tentetba Punjab Lok Congress aser Sukhdev Singh Dhindsa-i aniba Shiromani Akali Dal (Sanyukt) party den longjemer tokteptsü. Party asem yagi züingsem trok agi kümtetba palen ka tentetsü aser iba panel yagi party tem tsüingda menden lemdangtsü atema telemtetba agitsü.



Congress party tenzüker küm 137 ajungba anogo Congress tir Sonia Gandhi-i AICC nung party wako atsüketba noksa nung angur.



US tir Joe Biden-i White House nung COVID-19 Response team indang inyakyim nung shilem agiba noksa nung angur.

Israel nung Covid vaccine dose pezübuba tendang tenzükogo

Jerusalem, Luchii/December 28 (Agencies): Israel nung mozüki ka nung Hombarnü nungi lendongbang nung aliba nüburtem nem Covid-19 vaccine doses pezübuba agütsüsi atema tetendangba tenzükogo. Omicron variant agi animesoba wara azüoktsü nükjidong nung tang iba jenjang agir.

Tel Aviv tezülen Ramat Gan nung Sheba Medical Centre study nung antibodies adokdaksüba nung vaccine agi koba tashi mapang inyaker aser vaccine dose pezübuba agiba ajanga kecha timtem agütsür magütsü aji asadangtsü, ta otongdar kati ashi. Tetendangba nung shilem agir 150 prongla medical staff tem lir.

Health ministry expert panel kati taoba hopta Israel ya linüktem rongnung vaccine dose pezübuba agütsüba mezüngbuba linük asütsü atema benok. Vaccine ya arishi küm 60 temapur, immune system tashi maitertem aser medical worker tem nem agütsüsi.

Ajisüaka shot pezübuba agütsüsi atema ministry indang director-general, Nachman Ash nungi tatembangbuba temelaba atadar.

Kasa mapang nung Britain nung Oxford-AstraZeneca vaccine agütsüba ajanga Europe nung tanga linüktem den medemdangra linük nung tashidak agi asürtem tejamba lir, ta UK vaccines expert kati ashi.

UK indang taoba Vaccine Task Force mendenbuba Dr Clive Dix-i, Daily Telegraph dang ashiba agi, Oxford-AstraZeneca vaccine koba India nung Covidshield ta nungja melener agütsür, iba vaccine yagi Covid-19 agi tashiagi shirangtsü aser asütsü

aliba nungi talangba kümzüka toktsüsi akok. China nunga Hombarnü Xi'an yimti nung Covid-19 tashidak azüoktsü atema tenokdangba tesashi agütsüogo aser iba yimti nung alirtem gari nunga senzügenpongtsü memelar. Ita 21 sülen China nung tang tashidak tamajungtiba pokteta lir.

December 9 nü sangdongba osang nung ketdangsürtemi Xian nung nisung 635 dak tashidak potetogo ta metetdaksü, saka Omicron variant menaba indangbo kecha osang magütsü.

Maneni Australia nunga anogo nung nisung 10,000 dak Covid-19 tashidak potetogo, koba wara tenzükter tang mezüngbuba nisung aika dak tashidak potetba asütsü.

New South Wales nung Hombarnü nisung 6,324 dak tashidak potetogo. Mozüki nung temang anepalua alir nisung 520 rongnung nisung 55 bo intensive care nung yur temang anepaludar. Nütsünyongsük timtiba aliba state nung yasa Omicron variant agi mezüngbuba nisung ka asüba sangdongogo.

Britian sorkarisa 2021 küm matem tashibo England nung Covid-19 dak sendakba nung tenokdangba tasen magütsüsi, ta health minister Sajid Javid-i ashi.

US infectious-disease expert, Dr Anthony Fauci-i Hombarnü, Omicron variant timba küma aoba mapang ka nung "tensa tajungba maküm tsüngda tamajungba akümtsü," ta ashi.

"Anogo ka ana mesera hopta tsüngda tensa tajungba akümtsü onoki mimlar. Mapang talangba akümtsü akok saka kecha shia matatetsü," ta pai ABC dang ashi.

US Centers for Disease Control and Prevention-i Hombarnü ashiba agi, Covid-19 tashidak potetba osang angazükba sülen cruise ships 70 shi asadangdar, kechiyong Omicron variant kanga kara prokshia odar.

Tir Joe Biden-i ashiba agi, mozüki karbo Covid tashidak agi tawadakkak makai akümtsü saka wara azüoktsü atema linük renema lir aser America nungertem kecha shisabulutsü mali.

Biden-isa, Federal Emergency Management Agency (FEMA) dang United States nung coronavirus tashidak tedangba nung teyari agütsüsi atema tetuyuba agütsüogo, ta White House sangdong ka ajanga metetdaksü.

FEMA nem emergency aser disaster assistance amshidaktsüsi atema iba tetuyuba agütsüogo.

HHS nem nongloktsüba mission dak sendakba nung inyakyim atema sen intokba ajak FEMA-i agütsüsi, ta kasa tetuyuba nung shia lir.

Russia-i Navalny pusemer ana sota ayu

Moscow, Luchii/December 28 (Agencies): Russia-i nungtugu opposition lenir Alexei Navalny pusemer ana Mongolbarnü tepuokdaki yokogo, ta opposition activist kati ashi. Paisa, parnok tepuokdak küm talangka ayutsü akok, ta ashi.

Russia nunger ketdangsürtemi ita tsüngda Navalny den sendaka aliba teloktem meita odar, shiba tir Vladimir Putin anemer tulutiba ta züngshir. Pa tang parole nung aibelenba atema küm ana ser tesadang tepuokdaki yoker lir.

June ita Russia nung okadak kati Navalny indang anti-corruption foundation ya 'extremist' lir ta ashi.

Pa pusemertemi network tasen ajanga tanaben asendenshiba sülen ketdangsürtemi kasa ken o benoka lenirtem aitsü tenzükogo.

Mongolbarnü state investigator temi Siberia kübok Tomsk aser Irkutsk yimti indang taoba provincial election headquarters tekolakba dang ken o ashishitsü atema sota ayu, ta Navalny pusemer Leonid Volkov-i Telegram nung zülutsü.

Volkov-i ashiba agi, pai Kseniya Fadeyeva aser Zakhar Sarapulov naprongla dang Russia toktsür aotsü shidangogo, saka tenati memulung.

Taoba küm Serbia nung meim chidaktsüba sülen Navalny ya temang anepalutsü atema Germany-i anir ao. Mongontemi ashiba agi pa nem military nerve agent Novichok agütsü.

Russia sorkari iba taitüsüba ya magizük aser mongintemi ngutetba ya aitsüogo.

France nung mosque ka shibangtsü

Paris, Luchii/December 28 (Agencies): France sorkari linük anütok tiplen aliba mosque ka shibangtsü tetuyuba agütsüogo, kechiyong iba mosque indang imam yagi tashishitsü aketba

ken o sayutsüngia liasü, ta regional ketdangsürtemi Mongolbarnü AFP dang ashi.

Paris nungi kilometer 100 shi pilar aliba Beauvais jila kübok mosque ya ita trok shibanga ayutsü, ta Beauvais amenoka aliba Oise region prefecture sangdong ka ajanga metetdaksü.

Ketdangsürtemi ashiba agi, pai tsükchitèp adokdaksütsü, azütokshi aser jihad pusemtsü atema sayutsüngia liasü.

Interior Minister Gerald Darmanin-i, iba mosque shibangtsü atema inyakyim tenzükogo, kechiyong imam yagi o jembiba mapang Khristan, homosexuals aser Jews tem anema inyaksü atema sayutsüngia liasü ta hopta ana tejakdang ashiba sülen tang iba jenjang agiogo. Minister-isa iba ya agizütsü makok ta ashi.

Tenokdangba magütsü tsüngda local ketdangsürtemi temzüng ozüng kübok anogo 10 kuli bendentsü nungdaka liasü, saka Mongolbarnü AFP dang ashiba agi, iba mosque ya anogo ana tsüngda shibangtsüsi.

Local osang kaket Courrier Picard-i iba ita sangdong ka ajanga ashiba agi, iba mosque indang imam ya tawa-ang Islam yimsü agizükba lir.

France sorkari taküm küm tetenzüklen sangdong ka ajanga parnoki, tekülemdak asendenshir meita aotsü aser radical Islamic propaganda prokshiba lokti tentettem meita atattsü ta metetdaksüogo.

Interior ministry-i iba ita ashiba agi, France nung mosque aser Muslim nunger sarasademdak tesem 2,600 dak tema aliba rongnungi 100 shi meitaogo, kechiyong item tesemtem nung "separatist" ideology prokshia alitsü ta temulung meleme bilemer.

Extremism aser Islamist separatism anema France indang temzüng ozüng dak ajemdaker tesem trok shibanga toktsüsi atema asadangogo, ta ministry-isa ashi.



Miami International Airport nung passenger tem senzügenpongba noksa nung angur. Covid Omicron variant kanga kara prokshia aoba ajanga Hombarnü airline staff tem agi anungba agi tayimtsü aika thia liasü.

Tasoba Anogo Tepela Lemsateper

T. MAPUTALA AYOKLAR (AKHOYA)

29.12.1930 - 29.12.2021

Tsüngremer yongsük atendanga putu pezübubung ayaoka küm 91 tashi anema arishi moatsü nung Kibuba nem tenüngsang agütsür. Onok na nungi shisa tajung aika angazüka nü temeim tali jangjar. Maneni arishi talang den anema dokjang ta moaja sarasademtsür.



Chirnurtem, Anükapangtem, Amolartem, Semchirtem aser Kinungertem.

PELABA METETDAKTSÜR



ASO:
23rd Feb. 1976

ASÜ:
21st Dec. 2021

Kodanga amatsü makokba temeim kinungtsü asür **Lipokla Aier** wife of M. Supong Jamir (Asangma) Ajungpen iba alima toktsür aoba mapang jentipuri ozü asüko nung sarasadem aser shisatsü, nebo, rongsen, agi ozü melung sungzüktaksü nung nenok ajak dang kanga pelaba shisemer aser ozü-i nenok tonga aruagi pelaba meshitetsü asü nung iba osang kakat ajanga kinunger ajak tenüngnung teyanglur Tsüngremi talobusa moajang ta ozü sarasadem.

Temeim Kinungbo, Jala jabaso, Semchir aser Kinunger.

MULUNGNEN O

Onoki teti meima aliba tsürabur ojala late **P.Nangshimenla Imsong** akümüli wadang December 14, 2021 arishi küm 90 (1931-2021) nung tempanger asüyimi ogo.

Nenok taküm mapang, rongsen den nebo tenla tsüngdong arua yaritepogo. Onoki mamatetba pelaba metetdaksür. Adangji temoatsüba Tsüngremi moajangma.



"Kibuba matsüngdang Pa temeshipur asüba senti lir." T.Ken 116:15

Chirnur, Semchirtem, Tanabuba semchirtem aser sosem kinungertem.

Amazon Prime nung Gehraiyaan sayatsü

Mumbai, Luchii/December 28, 2021 (Agencies): Shakun Batra indang kanga dang yongya ataba film - Gehraiyaan ya sangküm sayatsü. Deepika Padukone, Ananya Panday aser Siddhant Chaturvedi nungeri tongti shilem agiba film ya January 25, 2022 nü Amazon Prime Video nung sayatsü.

'Gehraiyaan' ya drama film ka asütsü aser cast rongnung Nasseruddin Shah aser Rajat

Kapur nati tongti shilem agiba angutsü. Iba film ya Karan Johar indang Dharma Productions aser Viacom18 Studios den Batra indang Jouska Films longjemer yangluogo.

Iba film ajanga Dharma Productions den tesendaktep tali dang akangshir aser alima tesem ajunga nung audience dang iba drama sayatsü asoshi yongyar," ta director Sakun Batra-i ashi.

Thom Yorke den ken ka yangluner: Arlo Parks

Luchii/December 28, 2021


(Agencies): Arlo Parks-i Thom Yorke den külemi ken tajung ka yanglutsü jangraba lemsatepogo.

Arishi küm 21 tain kentener Arlo-i mapang talangka nungi Radiohead frontman - Thom Yorke aser rockers Arctic Monkeys densema artist balala den longjemer ken yanglutsü jangra liasü, kechiyong genre balala indang musician tem longjemer ken yangluba maparen sapur.

Arlo-i ashiba agi, Billie Eilish aser Frank Ocean mesüra Radiohead nungi Thom Yorke den longjemer ken balaka yangluner.

"Thom den longjemer Radiohead indang ken talisa 'Nude' mesüra 'House of Cards' amala yanglutsü tejangraba tulu lir," ta lai ashi m

"Arctic Monkeys telok den külemi ken yanglutetra jangratemtsüka asütsü. Genre



Arlo Parks

balala nungi artist tem longjemer inyakba maparen meimer," ta lai lemsatep.

Lockdown ajanga 'Just Go' kentener Arlo-i la indang mezüng kensep - 'Collapsed in Sunbeams' maparen timbaka renemadok. Taküm September ita Arlo indang kensep ajanga 'Mercury Prize' takok angu.

Iba kensep atema Arlo aser la den külemi inyaker Luca Buccellat (writing partner) nati tesem tajung ka nüngdaka liasü, saka tenati recording studio kati aotsü lemtet aser London kübok Airbnb nung maparen inyaka liasü. Tarutsü nunga Arlo-i ken tasen zülutsü tejangraba tulu lemsatep.

Kangana indang Tejas sangküm sayatsü



Mumbai, Luchii/December 28, 2021 (Agencies): Bollywood Star Kangana Ranaut-i film balala nung shilem agiba angutsü aser item rongnung 'Tejas' ka asütsü. Iba film ya Indian Air Force-i takok anguba otsü ka lir, koba film tangokba maparen tenzükogo.

Mongolbarnü, film yanglurtemi Tejas sayatsü asoshi anogo sangdongogo. Armed Forces Flag Day anogomung nung, produciton house RSVP-i Kangana Ranaut indang Tejas sayatsü asoshi anogo sangokja liasü.

Tejas yanglurtemi sangküm

2022 Dussehra mapang theatre nung iba film sayatsü ta lemsatep. Osang sangdongba ama maparen takok ngura, Tejas ya October 05, 2022 nung sayatsü imlar. Ronnie Screwvala indang RSVP ajanga iba film sayatsü osang sangdongba mapang nungi, social media nung Kangana Ranaut ya Air Force pilot Tejas Gill ama tangoker noksatem prokshiogo.

Iba film sayatsü anogo den külemi, Kangana-i set nung tangokba noksa tasen lemsatepa liasü.

Sarvesh Mewara-i zülua aser direct asütsü aliba film ya RSVP indang tanabuba Indian Armed Forces film ka asütsü. Taoba mapang RSVP-i Uri: The Surgical Strike yanglua lir.

Farah Khan-i Rajesh Khanna indang biopic yanglutsü

Mumbai, Luchii/December 28, 2021 (Agencies): Superstar Rajesh Khanna sor küm 79 ajungba anogomung (29.12.2021) atongtsü anogo ka lia, Mongolbarnü producer Nikhil Dwivedi-i nungtuugu bollywood star Rajesh Khanna indang biopic ka yanglutsü osang sangdongogo.

Iba film ya Gautam Chintamani indang nungtuugu kakat 'Dark Star: The Loneliness Of Being Rajesh Khanna' nung ajemdaker yanglutsü. Iba project dak sendakba nung Nikhil Dwivedi-i, "Gautam Chintamani indang kakat - Dark Star nung ajemdaker biopic yanglutsü asoshi rights' nguogo aser iba film maparen atema Farah Khan den jembidar. Iba dak alaka tanga osang magütsütettsü aser maparen takok ngua tenzükra nenok den osang lemsateptsü. Screen

audience aika puadaksü. Osang ajanga angazükba agi, tetsürtemi pei temang nung aliba azü (blood) agi Rajesh Khanna dang shidi zulu; pa noksa den kibong aküm aser 1973 March ita pai Dimple Kapadia den kibong akümba mapang tetsür aika temulung raksaa liasü.

Rakesh Khanna indang nungtuugu film rongnung 'Kati Patang', 'Anand', 'Haathi Mere Saathi', 'Bawarchi' aser 'Amar Prem' asütsü aser tanü tashi film sapurtemi item film mamatetter.

2012 küm cancer tashidak mekotteti Rajesh Khanna iba akümüli nungi pila oadok. Entertainment industry nung shilem tulu agiba atema, pa sür sülen, 2013 küm pa nem Padma Bhushan award (posthumously) agütsü, koba India nung civilian award temaba rongnung tasembuba asütsü.

Nagaland nung yakta saisapong infrastructure tajungba akümtsü: Rio



52buba Meriema Village Youth Games and Sports Meet indang nungshilong semzütsür sülen Chief Minister Neiphiu Rio aser tangartem külemi tangokba noksa nung angur.



Tsiesema Village Youth & Sports Association (TVYSA) Hon Jubilee benjungmung indang nungshilong semzütsür sülen Chief Minister Neiphiu Rio aser tangartem külemi tangokba noksa nung angur.

Kohima, Luchii/December 28, 2021 (TYO): Hombarnü (27.12.2021) Nagaland Chief Minister, Neiphiu Rio-i saisapongertem ajungkettsü asoshi State Sorkari bendanga agütsür inyaksü ta sangdongba mapang, lanur nem maongka tajungba agütsütsü asoshi State nung yakta saisapong infrastructure aser facility tajungba akümtsü, ta pai ashi.

Saispong sentong ana - Northern Angami-II Assembly Constituency kübok 52buba Meriema Village Youth Games & Sports Meet aser Tsiesema Village Youth & Sports Association indang Golden Jubilee benjungmung sentong nung jembiba mapang Rio-i iba olen lemsatop.

Rio-i ashiba agi, 2018 küm State General Elections agiba mapang coalition government indang Common Minimum Programme nung sangdongba ama, saisapong jangrartem atema saisapong kiojen tajungba yanglutsü asoshi Sorkari inyakdar.

Nagaland Police Sports Battalion atema maparen inyakdar, koba ajanga saisapongertem ajungkettsü mapang Dimapur nung Regional Centre of Sporting Excellence den shooting, archery, adventure

aser motor sports academy atema kiojen yanglutsü aser Tsiesema nung terepranger 20000 asemtsüsa Wrestling stadium den Kohima, Noklak aser Tuensang nung Indoor Stadium yanglutsü asalentong yangludat.

Naga lanurtem pei sempet sayutsü aser games & sports wadang nung tejakleni aotsü asoshi saisapong dak sendakba kiojentem tesem shitak nung yanglutsü atema Sorkari akok tashi inyaksü, ta Rio-i nangzüik.

Sangküm January 2022 nungi tenzüka Nagaland Olympic Association (NOA)-i küm shia Nagaland Mini Olympic ayongzütsü sentong renemdar, ta Rio-i metetdaksü.

Rio, shiba NOA indang president lir, aruya aliba asayamung tulu atema junga renemtsü aser shilem agitsü asoshi state nung district ajunga ayongzüik. Mezüngbo iba asayamung taküm asayatsü renem, saka Covid-19 wara süshia maoba ajanga iba asayamung masayatet.

Rio-i, sangküm January 2022 nungibo Indoor Stadium Kohima tsütsü aliba storey trok office building nung NOA maparen junga achaayanga inyaksü, ta metetdaksü.

Iba office lapokba ajanga NOA aser saisapong association balala

tsüngda tesendaktep tajungba yanglutsü asoshi ajungmesotsü aser State nung saisapong dak sendakba maparen balala tajungba achaayangsü imlar, ta CM Rio-i ashi.

Rio-isa, sangküm January 2022 tashi nungbo Nagaland-i South Asian Cross Country Championships ayongzütsü terenemba lir, kong linük trok - tenet nungi athlete temi iba asayamung nung shilem agitsü imlar, ta ashi.

"Naga lanurtem nem sabang agütsütsü asoshi State Sorkari iba amala national aser international asayamung tem ayongzüikner, saka lisopur saisapongertem medal mengura, ibaji taksüka asütsü," ta pai ashi.

Saisapong balala asayatsü asoshi Naga lanur nem sempet moaja lir aser State den National jenjang nung parnoki takok ngudaki, saka Asian, Commonwealth Games aser Olympics nung shilem agia takok angotsü asoshi saisapongertem takotet mali, ta pai ashi.

Anungji, temaba jenjang tongtetsü asoshi Naga nungertem dak ajemaluba, bendanga agütsüba aser ajemaluba shisatsü alitsü nungdaker, ta Rio-i ajungshia liasü.

Hombarnü Meriema nung, Rio-i 52buba Meriema Village Youth Games & Sports meet

benjungmung indang monolith, Meriema village playing field rostrum & gallery semzütsü aser pai Meriema Village Sanitary truck tenzüka liasü.

Iba sentong nung Rio-i, tentet balala aser yimertem longjemer inyakba ajanga item terenlok maparen ajak takok ngua inyaktet, ta metetdaksü.

Tesüiba küm 52 nungi games & sports wadang nung shilem tulu agia aser takok ngua aruba atema Rio-i Meriema village nem tenüngsang agütsü aser terenlok alitsüsa maneni meranga inyaksü asoshi pai yimertem ajungshiogo.

52buba Meriema Village Youth Games & Sports meet lapokba sentong nung organizing committee member, Neidilhou Keditsu menden liasü aser Meriema head GB Neiyalie Miachieo-i telok pela agizük.

Meriema Village Youth Organization president Asa Shüya-i tir o jembiba. MVYO games & sports secretary Pekruse-u Whuorie-i iba meet nung shilem agitsüpur team tem tenanzüktep agiba ketdangsüa agi aser Meriema Village Council

chairman Keduolhoulie Huozhai-i tepela anküp o jembiba.

Maneni, kasa anogo Tsiesema nung Rio-i, lenla ajunga nung terenlok alitsü asoshi Naga lokti nung telongjem aser yimji-yimjung alitsü nungdaker ta ashiba mapang, Nagaland nung chichiba yimji-yimjung alitsü asoshi State nung alir nübur ajaki külem sensopur asoshi bilenja aser telongjem nung inyaksüla, ta pai telok ayongzüik.

Iba sentong nung, Golden Jubilee organizing committee convenor Mhalelhou Mere menden liasü aser TVYSA president Kezevilhou Khro-i tir o jembiba. Tsiesema Village Council chairman Khrielezo Khro-i salem lemsatop aser Golden Jubilee organizing Committee co-convenor Ketholetuo Chietsü-i asayamung nung shilem agir team tem tenanzüktep ketdangsüa agi. Iba asayamung nung team trok - Mere, Pepfu, Khrabvii, Chietsüi, Yhor aser Khro agi shilem agidar. Asayamung anaprongla December 31, 2021 nü tembangtsü, ta kasa sangdong nung shia lir.

Saurav Ganguly dak Covid-19 putet

Kolkata, Luchii/December 28, 2021 (Agencies): Kolkata nung

Board of Control for Cricket in India (BCCI) president, Sourav Ganguly dak novel coronavirus putetba osang jangjaogo. Ganguly dak iba tashidak putetba sülen, Woodlands Hospital-i anir ao aser pa iba wara temaitsü agi terara kangshidar, ta sangdong ka ajanga metetdaksü.

Nungtugu cricket asayar Ganguly temang tajungba reprangtsü mechi Hombar aonung doctor temi pa mozüki nungang anepalutsü lemtet. Ganguly dak Omicron variant ali/mali tendangtsü/jangjatetsü atema pa indang blood sample ya genome sequencing atema yokogo.

December 24, 2021 nü Bangla superstar aser TMC MP Dev indang film tasen Tonic premiere asüba mapang Sourav Ganguly denogo aser idangji pai Nusrat, Yash, Babul Supriyo, TMC MLA Madan Mitra nungertem den ajurutepa liasü.

"Yasüng (Hombar aonung) pa Woodlands Nursing Home-i anir ao. Pa temang nung timtem den apet mozü agütsüogo aser pa temang tajungba lir," ta BCCI sangdong ajanga metetdaksü.

Taküm küm tetenzüklen January ita Ganguly teko nung timtem adokba/petsaperongba ajanga anaben tashi mozüki aoba sülen, taküm pa tasembubaba mozüki nung amunger asütsü. Kolkata nung pa (Ganguly) talidaki exercise agiba mapang pa temlungjang agi mapa meinyaki aküm aser pa coronary angioplasty agitsüsa kümadak.

Anogo 20 sülen, kasa timtem agi Ganguly kangshi aser January 28 nü tanaben angioplasty agia liasü aser iba mapang artery ana nung stent ana inok.

March ita nungi Ganguly-i pa maparen tenzüksü aser Covid-19 vaccine agia liasü. Pa teti tambusang Snehasish Ganguly-a taküm küm tetenzüklen Covid-19 putetta liasü.

Vekuzo-i Khomi Wrestling 2021 kokogo



Khomi Wrestling Association indang 13buba Wrestling Meet 2021 nung shilem agirtem den tanga tongtibang nübutem külemi tangokba noksa nung angur.

Khomi, Luchii/December 28, 2021 (TYO): Phek district kübok Mongolbarnü Middle Khomi nung Khomi Wrestling Association (KWA) indang 13buba Wrestling Meet 2021 asaya liasü. Iba Meet nung Vekuzo Veziih-i takok angu, ta sangdong ajanga metetdaksü.

13buba Wrestling Meet 2021 nung Khriiku Veziih, Kiichohii Ciirha aser Shurhovoyi Nienu nungertem tanabuba, tasembuba

aser pezübuba jenjang ajangzüktet.

Under B wrestling category nung Miilitso Nienu, Maha Lohe aser Mave Lala nungertem mezüngbuba, tanabuba aser tasembuba jenjang nung takok angu.

Maneni, under 16 years category nung Miilibi Dziido-i takok ngua liasü. Kasa category nung Thatsoyi Lohe aser Yove-o Tetseo nati

tanabuba aser tasembuba jenjang ajangzüktet.

Iba Wrestling Meet sentong nung, MLA Kezhienyi Khalo aser Vechita Khesoh, taoba mapang Nagaland Wrestling Association (NWA) champion aser certified wrestling coach Netaji Subhas National Institute of Sports Patiala na tongti tesemdanger aser tetushi tesemdanger ama denogo, ta kasa sangdong nung shia lir.

BILEMDANGANG

"Ochi oji ochi mapa agi kuli asütsü."